

4.5. Espacios e instalacións:

As condicións de espacio e instalacións que deben reuni-los centros educativos son as que fixa o Real decreto 389/1992, do 15 de abril, polo que se regulan os requisitos mínimos dos centros que imparten ensinanza artística.

Para os efectos do disposto no artigo 40.1º, parágrafos k), l), m), do real decreto anteriormente citado, os módulos do presente ciclo formativo clasifícanse nos seguintes epígrafes:

* Teóricos:

-Historia da cultura e da arte: artes aplicadas da escultura.

-Materiais e tecnoloxía: artes aplicadas da escultura.

-Formación e orientación laboral.

* Teórico-prácticos:

-Debuxo artístico.

-Debuxo técnico.

-Volume.

* Talleres específicos:

-Taller de dourado e policromía.

Espacio formativo	Superficie	Grao de utilización
Aula de informática	30 m ²	5%
Aula teórico-práctica	80 m ²	30%
Aula teórica	45 m ²	20%
Taller de dourado e policromía	60 m ²	45%

4.6. Relación numérica profesor/alumno:

De conformidade co establecido no artigo 44 do Real decreto 389/1992, do 15 de abril, polo que se regulan os requisitos mínimos dos centros que imparten as ensinanzas artísticas, manterase unha relación numérica entre profesor/profesora e alumno/alumna non superior a 1/15 no módulo seguinte: taller de dourado e policromía. Ó resto dos módulos aplícase a ratio máxima 1/30.

En función da dispoñibilidade de cada centro e sempre que sexa posible, tenderase a aplica-la relación 1/15 nos módulos impartidos nas aulas teórico-prácticas.

4.7. Correspondencias:

Poderán ser obxecto de correspondencia coa práctica laboral os seguintes módulos:

* Taller de dourado e policromía.

* Formación e orientación laboral.

Así mesmo, poderán quedar total ou parcialmente exento da fase de formación práctica en empresas, estudos e talleres, quen acredite experiencia laboral no campo profesional directamente relacionado con este ciclo formativo.

4.8. Acceso ó bacharelato e validacións:

4.8.1. Modalidades do bacharelato ás que dá acceso este título:

* Bacharelato de artes.

4.8.2. Módulos do ciclo formativo que poden ser obxecto de validación con materias do bacharelato:

Módulo profesional	Materia do bacharelato
Volume	Volume
Debuxo técnico	Debuxo técnico
Debuxo artístico	Debuxo artístico I

4.9. Distribución horaria:

* Os módulos profesionais deste ciclo formativo organízanse da seguinte forma:

Horas totais	Denominación dos módulos
	1º, 2º e 3º trimestre
65	Materiais e tecnoloxía: artes aplicadas da escultura
95	Historia da cultura e da arte: artes aplicadas da escultura
130	Debuxo artístico
160	Volume
315	Taller de dourado e policromía
130	Debuxo técnico
65	Horas de libre disposición
960	Total
	4º, 5º e 6º trimestre
390	Taller de dourado e policromía
65	Formación e orientación laboral
455	Total
120	Obra final
65	Formación práctica en empresas, estudos ou talleres
185	Total

Decreto 120/2002, do 22 de marzo, polo que se regula a consolidación parcial do complemento específico dos directores dos centros escolares públicos.

A Lei orgánica 9/1995, do 20 de novembro, da participación, a avaliación e o goberno dos centros docentes, establece no seu artigo 25 que os directores dos centros públicos nomeados de acordo co procedemento establecido na propia lei, que exercen o seu cargo, con valoración positiva, durante o período de tempo que cada Administración educativa determine, manterán, mentres permanezan en situación de servizo activo, a percepción dunha parte do complemento retributivo correspondente, de acordo co número de anos que exercen o seu cargo.

Así mesmo, remite ás administracións educativas o establecemento das condicións e requisitos para a percepción deste complemento.

Na súa virtude, de acordo co artigo 31 do Estatuto de autonomía de Galicia, o Real decreto 1763/1982, do 24 de xullo, sobre traspaso de funcións e servizos da Administración do Estado á Comunidade Autónoma de Galicia en materia de educación, no uso das atribucións conferidas pola Lei 1/1983, do 22 de febreiro, reguladora da Xunta e do seu presidente,

por proposta do conselleiro de Educación e Ordenación Universitaria, de acordo co dictame do Consello Consultivo de Galicia e logo de deliberación do Consello da Xunta de Galicia na súa reunión do día vintedous de marzo de dous mil dous,

DISPOÑO:

Artigo 1º.-Consolidación do complemento específico.

1. Os profesores de centros públicos que desempeñasen o posto de director do centro docente público nos termos previstos na Lei orgánica 9/1995, do 20 de novembro, da participación, a avaliación e o goberno dos centros docentes consolidarán, ó cesaren no cargo, logo de valoración positiva desta función e mentres permanezan na situación de servizo activo, parte do complemento específico por tarefas de dirección na forma e condicións que se determinan neste decreto.

2. Os profesores que consolidaron a parte de complemento específico correspondente á función directiva terán dereito a percibilo cando cesen no cargo de director e mentres permanezan na situación de servizo activo.

3. Este complemento específico será incompatible coa percepción da compoñente singular do complemento específico pola titularidade de órganos unipersonais de goberno e polo desempeño de postos de traballo docentes singulares.

Artigo 2º.-Porcentaxe de consolidación.

A porcentaxe de consolidación con referencia ó importe do compoñente singular por tarefas de dirección, segundo o período de tempo de permanencia no posto, será acumulativamente o seguinte:

-Primeiros catro anos de permanencia: 25%.

-Segundos catro anos de permanencia: 15%.

-Terceiros catro anos de permanencia: 20%.

O total acumulado por estas porcentaxes non poderá exceder do 60%.

Artigo 3º.-Cambio de categoría do centro.

Cando, durante o período de desempeño da dirección, o centro vise modificada a súa categoría, a porcentaxe correspondente aplicarase sobre o importe asignado ó complemento específico do centro de maior categoría.

Artigo 4º.-Desempeño da dirección en dous ou máis centros.

Cando o período de permanencia de catro anos se complete polo desempeño da dirección en dous ou máis centros, a porcentaxe correspondente aplicarase sobre o importe asignado á categoría do centro que teña maior complemento específico.

Artigo 5º.-Intercambio das porcentaxes.

Unha vez consolidado o segundo ou o terceiro período de permanencia na dirección, o interesado poderalle solicitar ó delegado provincial de Educación e Ordenación Universitaria o intercambio das porcentaxes, de tal xeito que ó primeiro período se poderá aplicar un 15 ou 20% en lugar do 25%;

ó segundo un 25 ou 20% en lugar do 15% e ó terceiro un 25 ou 15% en lugar do 20, sen que en ningún caso se poida supera-lo 60% do total acumulado.

Artigo 6º.-Renuncia dunha porcentaxe.

Unha vez consolidados os tres períodos máximos previstos neste decreto, e se o interesado presta servizos como director outros catro anos, poderá renunciar a unha parte do complemento específico xa consolidado, solicitando que a porcentaxe correspondente se lle aplique sobre a contía do complemento específico da última dirección desempeñada.

Artigo 7º.-Criterios que deben informa-la avaliación.

1. A valoración positiva da función de director do centro é requisito previo e necesario para a consolidación do complemento que regula este decreto.

2. A avaliación da función directiva atenderá á evolución durante cada mandato do funcionamento do centro en relación co desempeño do cargo de director, e entre os criterios que a informen deberán incluírse os seguintes:

a) Dinamización dos órganos de goberno e de coordinación docente do centro, e o impulso da participación nestes dos diversos colectivos da comunidade educativa.

b) Xestión dos recursos humanos e materiais para proporcionar unha oferta educativa ampla e axustada ás demandas sociais.

c) Organización de actividades extraescolares que favorezan a apertura do centro, conectando este co seu contorno.

d) Disponibilidade para atender-lo alumnado e ás súas familias, ofrecendo información e respondendo ás súas demandas.

e) Impulso e posta en marcha de programas e iniciativas de innovación e formación que melloren o funcionamento do centro.

f) Dinamización da atención á diversidade dos alumnos con necesidades educativas especiais.

3. A avaliación da función directiva será realizada por unha comisión coa composición que determine a Consellería de Educación e Ordenación Universitaria.

Disposición adicional

Para os efectos do establecido no artigo 1º deste decreto, computaranse tódolos nomeamentos de director en vigor a partir do 1 de xullo de 1996.

Disposición derradeira

Autorízase o conselleiro de Educación e Ordenación Universitaria para dicta-las disposicións necesarias para a aplicación e desenvolvemento do establecido neste decreto.

Sobrado, vintedous de marzo de dous mil dous.

Manuel Fraga Iribarne
Presidente

Celso Currás Fernández
Conselleiro de Educación e Ordenación
Universitaria